

**U R D H Ë R**  
**Nr.54, datë 8.4.2003**

**PËR HARTIMIN, MIRATIMIN DHE NDJEKJEN E PLANIT TË VEPRIMIT “PËR  
MENAXHIMIN E SEZONIT TURISTIK VEROR 2003”**

Në mbështetje të pikës 3, të nenit 102 të Kushtetutës,

**U R D H Ë R O J:**

1. Ministria e Rregullimit të Territorit dhe Turizmit, brenda datës 15.4.2003 të miratojë planin e veprimit “Për menaxhimin e sezonit turistik veror 2003”.

2. Ministria e Rendit Publik dhe Ministria e Financave, në bashkëpunim edhe me ministrinë dhe institucionet e tjera qendrore, të marrin masat ligjore e teknike, për lehtësimin e procedurave të hyrje-daljes të shtetasve të huaj në pikat e kalimit kufitar dhe për lejimin e hyrjes së turistëve të huaj, pa vizë, gjatë sezonit turistik veror, sipas vendimit nr.439, datë 4.8.2000 të Këshillit të Ministrave me ndryshimet përkatëse.

3. Ministria e Rendit Publik dhe Shërbimi Informativ Shtetëror të marrin masat për sigurimin e rendit, zbatimin e etikës profesionale të Policisë së Shtetit dhe, në mënyrë të veçantë, për rritjen e sigurisë në akset kryesore rrugore dhe në zonat turistike.

4. Ministria e Transportit dhe Telekomunikacionit dhe Ministria e Rendit Publik, në bashkëpunim me organet e qeverisjes vendore, të organizojnë punën për përmirësimin, sigurimin dhe shtimin e sinjalistikës rrugore në akset kryesore kombëtare dhe, në mënyrë të veçantë, në zonat turistike.

5. Ministria e Rregullimit të Territorit dhe Turizmit, në bashkëpunim me Ministrinë e Rendit Publik, të marrë, për periudhën 1.6.2003 deri më 30.9.2003, brenda datës 10 të muajit pasardhës, të dhëna mujore për hyrje-daljet në pikat kufitare.

6. Ministria e Rregullimit të Territorit dhe Turizmit, në bashkëpunim me Ministrinë e Transportit dhe Telekomunikacionit dhe me organet e qeverisjes vendore, të vendosë tabela promocionale në pikat e hyrje-daljes dhe në qendrat e qyteteve.

7. Ministria e Rregullimit të Territorit dhe Turizmit të marrë të gjitha masat për licencimin e subjekteve, që merren me veprimtari turistike (si hoteleri, agjenci turistike, udhëtimesh, transport turistik), si dhe të bëjë regjistrimin dhe klasifikimin e njësisë pritëse turistike.

8. Ministria e Financave dhe Drejtoria e Përgjithshme e Tatim-Taksave të marrin masa për mbledhjen e tatim-fitimit të planifikuar mbi baza reale nga të gjitha subjektet turistike, si dhe në bashkëpunim me Ministrinë e Rregullimit të Territorit dhe Turizmit, të nxjerrin një udhëzim të përbashkët për licencimin dhe kontrollin e ushtrimit të veprimtarisë turistike.

9. Ministria e Financave dhe Drejtoria e Përgjithshme e Doganave të marrin masa përkatëse për mbështetjen financiare dhe kryerjen e procedurave administrative të nevojshme, në kuadër të planit të veprimit “Për menaxhimin e sezonit turistik veror 2003”, për lehtësimin dhe thjeshtëzimin e procedurave doganore në pikat kufitare për shtetasit e vendeve fqinje, me kombësi shqiptare (Kosovë, Maqedoni, Mali i Zi).

10. Ministria e Rregullimit të Territorit dhe Turizmit në bashkëpunim me Ministrinë e Kulturës, Rinisë dhe Sporteve të organizojë veprimtari të përbashkëta për hapjen e sezonit turistik dhe veprimtari të tjera kulturore e argëtuese, në bazë të kalendarit të veprimtarive kulturore të planifikuara.

11. Ministria e Rregullimit të Territorit dhe Turizmit të organizojë punën për rifreskimin e vazhdueshëm të materialeve promocionale (guidave, fletëpalosjeve, posterave etj.).

12. Me nismën e Ministrisë së Rregullimit të Territorit dhe Turizmit, të Ministrisë së Pushtetit Vendor dhe Decentralizimit, të Ministrisë së Mbrojtjes, si edhe në bashkëpunim me organet e qeverisjes vendore, të merren masa për pastrimin e plazheve dhe të mjediseve përreth tyre, për heqjen e mbetjeve inerte dhe të hedhurinave të ndryshme, sidomos në plazhet e Durrësit, të Golemit, Vlorës, Sarandës, Pogradecit, Himarës dhe Shëngjinit.

13. Ministria e Shëndetësisë, Ministria e Pushtetit Vendor dhe Decentralizimit dhe prefekturat e qarqeve në bashkëpunim me organet e qeverisjes vendore, të marrin masa për organizimin e shërbimit të pastrimit të përditshëm të plazheve dhe të shërbimeve komunale, të shërbimeve për

sigurimin e ndihmës së shpejtë mjekësore dhe për ofrimin e shërbimit zjarrfikës.

14. Ministria e Transportit dhe Telekomunikacionit, në bashkëpunim me Ministrinë e Pushtetit Vendor dhe Decentralizimit dhe me Ministrinë e Rregullimit të Territorit dhe Turizmit, të marrë masat përgatitore për sigurimin e shërbimit telefonik, për përfundimin e punimeve për shtrimin, sistemimin dhe asfaltimin e rrugëve kombëtare dhe vendore në zonat turistike.

15. Të gjitha ministratë dhe institucionet e përmendura në këtë urdhër të njoftojnë rregullisht, çdo 15 ditë, Ministrinë e Rregullimit të Territorit dhe të Turizmit për masat e marra dhe detyrat e kryera.

Ky urdhër hyn në fuqi menjëherë.

KRYEMINISTRI  
**Fatos Nano**